

湖

上

集

大明吳江徐廉曾伯魯

避暑別業

炎熱滿城無計祛
清涼獨自愛村居
數聲菱唱風前急
十里荷香雨後疎
無事長爲河朔飲
有時還著茂陵書
晚來移棹溪頭宿
暑氣蕭蕭月上初

訪萬嘉定同年

練縣風光春正饒
况逢嘉節近元宵
孤城燈火

千家市一葉舟航兩度潮
海嶠暫棲鸞鳳翮
天涯重見鵲鴿翹
鰲山高會誰當繼
應在金堤第五橋

送趙文瀨分教元城

昨夜文星照白溝
知君騎馬過山樓
盤餐聊自飽
苜蓿氣猶能射斗
牛
三月春風經幄暖
雨齋時雨墨池幽
廣文原不嫌官冷
空對簷花憶唱酬

題寒塘宿鴈圖

閣試

秋深陽鳥落平蕪
誰對寒汀繪此圖
日暮江南

眠最穩天空沙際影仍孤
刷毛自分霜華老斂
翩那思風力扶但願衡陽得飛去不愁雲路稻
梁無

寓虎丘脩縣誌陸太以詩見寄次韻奉酬
暫將蹤跡寄名丘豈有仙人太白樓寥落不堪
稱外史疎庸空欲繼前脩遺編獨對三更月砥
柱誰廻百折流異日若爲知我者謾嗟筆削愧
春秋

昌平劉水西先生壽詩

刑科都給事中一
麟之叔父誕辰在

中秋

帝京西北有神州中有高人樂隱遊花縣昔仍潘
岳任瑣垣今爲謝玄留景分閭闔天邊月酒
酌芙蓉鏡裏秋更羨舊廬歸去好南山遙對水
西樓

奉使出都城留別省中僚友

瑣垣一載謾相從握手論交意氣濃共喜明揚
司獻納獨慚尸素負遭逢雲邊回首天初遠河
外驅車路尚重此別應須了王事山靈且莫
笑周顒

宿定興公署次壁間甘刑部同年韻

我從北去投安肅君自南來過白溝去日霜華
侵晚歲來時楓葉向新秋浮蹤共惜萍波轉借
榻聊爲柏府留昨日仙宮忽言別君頃餞予于靈濟宮看
詩翻使憶 皇州

次栢鄉瞿廣平同年見訪兼有青萍之贈
走筆酬謝

郵亭忽枉故人車把袂相驚別歲餘初政已居
畿輔最多情猶訝信音疎風塵荏苒王程急行
李蕭條宦橐虛佩劍囟囟荷持贈酬君何處覓
雙魚

駐順德贈別謝省長

兵垣同事半年餘，駐馬思君問謫居。
三輔才名今獨最，一緘封事舊何如。
銜杯且盡燈前話，繫帛還脩別後書。
若過江南須見訪，松陵深處是吾廬。

留簡劉順德同年

相逢岐路各東西，共憶容顏夢不迷。
昨歲朱旛勞出守，今宵白馬借幽棲。
故人自識宮袍舊，新館遙看塞月低。
幸有同僚能作主，銜杯直欲聽鳴鷄。

沙河道中見流民感而有賦

沙厚風高驛路長
龍岡南去是何鄉
流移獨見此邦苦
招納須憑外郡良
落日牛羊羣壟廢
清霜草樹半村黃
游人無限傷心處
滿目寒雲接大荒

過呂公祠

在邯鄲縣北二十里額曰黃梁仙跡

邯鄲城北舊樓真
數里斜陽紺殿新
乘興偶尋祠下跡
回看卻是夢中身
執炊暫借片時火
留宿重揮半榻塵
此去自憐聊適意
不須探枕問仙人

弔盧生

有唐天子紀開元
陌上逢仙細討論
黍餽纔炊三昧火
塵寰已斷百年根
晝長睡起雲遶盡日
暮香銷石榻溫
多少祠前車馬客
幾人能脫夢中魂

晚入邯鄲城

火雷三震壁門開
鼓吹遙迎使節來
畿輔地從今日盡
河梁路向詰朝催
一函寶冊金枝重
萬里黃河錦浪堆
最是勝遊多感慨
白雲回首憶叢臺

渡漳河

驅車登陸苦風煙半月漳河始見船
簫鼓忽從雲際起帆檣疑是夢中懸
青山北聳分韓魏錦浪西來落澗瀍
擊楫未酬平昔志數年空著祖生鞭

贈鄭山人

旅館相逢誼更親
憐君歲久客囊貧
詞華曾著梁園賦
聲聞仍追鄴下塵
宗國脩書千卷富
長途倚劔二毛新
他年各遂歸與志
谷口頻來訪子真

次彰德盛上舍見訪有贈

故鄉喬木藹森森更羨栽培歲月深
謾向梁園題白雪曾從璧水著青衿
逢橋定結相如驂攜橐多藏季子金
須信相知在傾蓋長亭一爲爾披襟

壽南潯紀翁八十

漢家輪帛未招賢老卻山人八十年
泉石漫同溪上叟煙霞長伴島中仙
明經有子意獨愜子舉鄉進士彈鋏無魚跡自偏投贈何須覓新句南山自有舊詩篇

壽醫士王君七十

賣藥攜琴生事休年來不覺鬢飈颿囊中丹訣
抽新祕膝下青衿續舊遊君初亦爲弟子負蒲酒預傳
朱節近橘泉長貯玉壺秋他時訪爾吹笙處應
在仙人十二樓

送魯司訓轉官澧州不赴謝歸

絲柳垂垂送去舟一官初調卽歸休傳經不厭
千家博拂袖殊爲百歲謀吳下風煙詩卷在楚
中山水夢蒐遊到家應有魚書報須道熊熊兆
玉樓

壽華嚴寺祖芳上人六十

一衲蕭然六十秋，珠林煙水晚悠悠。
每將梵語探宗密，幾向詩壇訪貫休。
種竹更攜碁局去，賣琴還把藥囊脩。
遙知壽日重陽近，先寄茱萸作酒籌。

重過圓詮師院和姜丈夢賓韻

塔影沈紅夕照遲，山中寧寂臥禪師。
十年識面憐方外，一日論心勝舊時。
下榻煮茗仍好客，焚香展卷細評詩。
共推憲伯陽春調，零落交遊勞夢思。

荻塘詩贈紀貳尹

彭澤歸來徑未荒
蘆花深處結茅堂
每乘野艇
齏鱸膾閒倚蓬窗
數鴈行
霜露相鮮
秋寂寂
水天交映
晚蒼蒼
何時能躍西塘馬
長憶伊人在一方

丙寅元旦作

重請明農又一年
天顏咫尺五雲邊
曾中豈有匡時略
囊底仍無買藥錢
百歲風光分白社
半生心計在青編
芳春若肯相留戀
何必還丹學偓佺

橘泉詩贈醫者

井畔朱苞正鬱然種來渾似洞中天香溥野露
金衣淨色竝雲崖玉醴鮮萬葉欲舒人共摘一
瓢新汲世皆傳知君肘後方多祕不數郴州舊
日仙

送蘇貳尹同年轉令黃陂

西蜀當年負重名知君此出爲蒼生禁中三島
通仙籍君由左給事中謫官天畔孤帆引客程澤國秋陰
棠樹密楚江春暖瘴煙清風雲會有重來日還
作商霖翊聖明

送李丞之任武陵

席掛秋風杳莫攀
離尊今日且開顏
十年提篋遊燕市
百里鳴琴入楚關
楊柳橋邊羌笛遠
桃花溪上吏情閒
懷中有璧須珍重
莫向巫山點一斑

已巳春得考察報自述

旅叩楓宸十七秋
勳庸卻對鏡中羞
六經考察官猶在
一乞休閒志未酬
書卷隔年供蠹食
藥囊終日倩人收
蒼天幸許斯文與
未把衰殘付壑溝

與山詩贈陸山人

曲磴茅茨繞薜蘿
問君相與近如何
豈無佳客臨門在
爭似肅州作伴多
生態隨時忘歲月
世情何處起風波
莫嫌岑寂憑誰遣
長聽樵人伐木歌

葉大順父赴社吳興贈以紵舄并賦此詩
江畔銜杯暫解歡
贈君雙舄助登壇
情堪方駕雷陳易
詩到齊名李杜難
明月滿船寒夜永
北風吹席客裘單
雪中應有陽春調
此去賡酬意未闌

送柴司訓遷諭費邑代人作

聖化依然說魯封
費城山水接龜蒙
分符總未司民牧
振鐸還應作士風
水滿虹梁催去鷁
天開雲路見征鴻
晴窗卻憶握衣日
經史頻勞指授功

寄壽岑紹興

謾說神交共
聖朝憶君千里隔
雲霄瑣垣白
簡窻前草越郡青
山笏外邀肯酒
燕胥仍吏隱
清歌樂只協民謠
他年廊廟求耆德
頭白雍雍聽九韶

壽魏鴻臚六十閩人求

壽域弘開際 聖堯况逢斗極轉東柏堦舒
葉春初動杯接椒花臘正饒文獻總承華閭譜
簪纓會相 紫宸朝遠人欲效南山祝遙倚崑
峯弄玉簫

弔按察副使楊君

十五年來翊

聖朝翩翩雙翮薄雲霄梁園幾

賦三冬雪

君初爲行人奉使藩國

法署時鳴五夜鑣作郡

無端遭貝錦

君守真定以賣餘糧賑貧生被論聽勘

轉官依舊協

民謠

未論之先遷雲南按察副使

寬

恩未到身先死

歿後始知

免有提問長使孤冤恨未消

繳補禮科部檄并疏乞休簡何文選方考
功

忽奉除書怯振冠封還端不爲風湍寅清幸與
巖廊議衰病那勝瑣掖官數載涓埃羞未罄一
生懷抱對誰寬年來已辦長歸計勿向東山憶
謝安

齋奏人還得貴州學使吳明卿書卻寄

萬里緘書寄瑣垣祗疑萍跡離家園豈知衰病
銷官况獨仗忠良報主恩敷教不嫌居陋俗

論心卻少共芳尊細思後會應難料只有丹心
兩地存

顧刑部以詩集見遺因贈

寶集攜來自括蒼才名久矣擅詞場虎頭南史
稱三絕驚羽中朝映七襄初仕自求居冷局再
遷今去作仙郎欲知世掌秋臺法

君祖曷嘗爲
刑部郎中

西翰新詩接盛唐

送顧刑部之京

數載馳驅遠帝鄉轉官今始作仙郎挂帆猶
帶三更月秉筆能銷六月霜別去江楓侵暮色

到來宮柳漏春光遙知京國梅花少欲寄無由
意更長

甲戌立春日

是歲閏十二月十六日交明年春

集長兒張

仙會友

望六無孫負隱憂仙家抱子待人求高祿豈必
迎梁燕善頌何須借海榴弧矢他年酬壯志笙
歌今夜集名流玉環自昔傳蘇老靈應能如二
子不

乙亥元旦作

滿引屠蘇迓歲臨同雲千里護春陰寒威漸向

圍爐散曙色偏宜積雪侵懷裏有孫初學笑尊
前無事且高吟堯天忽憶朝元節空負當年
捧日心

宿雲汀念公房有贈

肯信窮途借榻難逢師才得一宵安多情不吝
禪牀淨無礙應知法界寬山徑風微黃葉少江
洲雨過白雲寒明朝別去如相憶重到還乘雪
夜闌

悼葉山人有序

吳邑東洞庭人葉順父諱天裕號白石

家貧工詩時多警向年三十餘來遊吾
邑而娶妻遂家焉萬曆改元有故人宦
于湖襄君往訪之去三年不返或傳初
去卒于丹陽道中縣令詢知其爲詩人
買棺斂之其子扶櫬令復資之以歸及
啓視髮黑不類姑葬于所居之旁後又
有傳君題詩于太白樓歲月識甲戌秋
且信且疑余愛其才而憐之乃賦是詩
湖海萍蹤任所之杳然長去失歸期詩
飄零落
今安在旅櫬虛無汝自知遠宦故人曾
遇否留

家稚子但傳疑游竟只道鄉關近頻向清宵入
夢思

壽韓君六十

二月梅花香滿庭折來遙寄祝修齡春迴湖海
平潮綠雨過池塘新草青金甌味清當席醉玉
簫聲細倚樓聽相逢定有安期叟同向山中煮
茯苓

弔盧貢士

識君雖晚誼殊親臘月江寒赴遂湮家學相承
秋薦早丹書無奈歲華新城隅地僻庭留鶴溪

上雲深塚臥麟宿草未枯哀可盡束芻如玉愧
詩人

過友人看菊留酌

西郊縱步衆芳殘十月霜清菊耐寒金鈿間舒
龍腦辦玉毬兼簇荔支盤能令杜甫兩開淚翻
作陶潛一醉歡爲問主人真好客梅花開遍再
來看

壽凌君

六十年來髮未黃林臯閒適度流光庭中養鴿
乘風放竹裏烹茶待客嘗叢菊散金娛晚節倚

蘭雕翠吐春香郊西景物年年好長對南山竚
夕陽

贈浙人李近山

浮峯山下野人廬借問何年此卜居青靄氤氲
來几席翠微蔥蒨映郊墟攜筇暫出封苔徑擁
膝唯鈔種樹書何必煙霞深處好柴門已絕使
君車

題杏林賜燕圖贈陳學諭

畿甸春晴花滿蹊杏園聞在曲江西紅霞片片
迎風散紫燕雙雙拂羽齊天上錦叢開麗日苑

邊金勒擁芳隄玉河不減唐家勝君去香塵送
馬蹄

夢與客席上分詠得骰子覺而記之

六隻雕裝六數重信君一擲奪先鋒牌中名色

看相似集上詩聯訝偶逢近年好事者取詩句爲色譜角勝

未須依譜例隨意取義合歡聊得借雍容莫言博奕

賢乎已長憶宣和恨反濃

送邑掾盛惟剛滿考東還

長揖郎官上畫舫東歸江闊片帆高三途稍待
他年用再考纔書積歲勞唐世賢良推錄事漢

家徵辟重功曹故園莫戀鱸魚美早向神京振舊袍

湖上聞得第三孫有作

簷前羣鵲聲和啞果報添孫喜動容長憶雙熊曾入夢敢云三鳳可興宗桑蓬挂戶風光媚湯餅邀賓花事濃回首往時怜寂寞翻驚今日慶重重

喜得第四孫

阿宣五夜報生郎阿宣陶靖節第二子小名也今借用起坐推窓望曙光未論後來添幾乳且看今日聚同堂榴

花照眼須秋實蘭草侵衣待晚芳目下四孫紛
繞膝不知若箇繼書香

吳封君挽詩三首

曾從旣冠覲丰姿正與郎君在泮時盛德醉心
衰俗變重恩炫目晚年馳三冬暖閣蒼煙暝
數畝陰堂白日遲仰止不堪無限意幾回悽切
淚雙垂

延陵公後世多賢遠送丹旌惜遺筵桂劍尚聞
君義在奠芻休咲我家傳庭中舊桂從三代堦
畔餘蘭任百年溟漠杳然迷去處空歌薤露朔

風前

初遊璧水着藍袍起拜 封章冠六曹再命總
如林下叟百杯不讓酒中豪塵蒙琴劒空齋冷
雲覆松楸吉地高外史修書求隱逸傳文應爲
爾揮毫

戊寅歲夏涼

六月交來氣尚涼午時猶自索衣裳弄晴無奈
雲常掩催雨其如風太狂便與春和相上下那
知歲事竟豐荒從茲伏熱未爲晚會見青苗滿
路旁

濬河後觀長橋二首

疏鑿由來繼禹功
三江不與舊時同
幸存兩道能趨海
何必千橋始奏公
勅使勞心裨國計
議臣長慮達宸聰
汪洋湖水今東注
月浸長橋似挂虹

衆隄同決水潺湲
入海滔滔性不慳
數里雲煙青似鏡
兩灘松栢翠於山
漁歌欸乃聲相和
客舫夷猶話可扳
乘月正當三伏日
良宵無暑不知還

賀馬君封郡理

歲月遲遲七十餘小園春色接郊墟郡齋未許
迎鳩杖江郭新傳下鳳書乍着錦袍叅牧守仍
將韋帶混樵漁不須叢桂重招隱合遣山靈候
綵輿

張文學來韶書齋盆池植碧荷夏月盛開
顧吏部過賞爲之寫圖一時題詠頗衆文
學持以見示謾賦一律

芙蓉別種出仙宮池水漣漪接太空漢女尋芳
香郁郁湘妃拾翠佩葱葱靚粧弱質終還白點
抹幽姿卻妬紅曉坐高齋裊清馥綠衣相暎露

華中

賀沈體道受封

休文之後世多儒江左風流美丈夫數代詩書
聞上國一時科第甲中吳橋門業就簪纓舊郎
署恩霑雨露殊遙寄萬金無別語愛君憂
國在江湖

壽蕭君六十

橫山東盡有平陽君自西來築草堂橋畔綠榆
含曙色庭前丹桂散秋香閒身但結漁樵伴幽
況能招鶴鶴翔稍待重逢稱慶日畫梁高處度

封章

題鴻麓隱居圖贈無錫華君道弘

鴻山之麓鬱蔥蔥徵士門前列桂叢曉滴露華
唯點易秋烹蓴菜但歌風雲連慧嶺千重碧日
落鷺湖十里紅勝槩曾中都領略更聞玄度冠
江東

代人題畫壽周太守

吳天翹望老人星南極騰輝照戶庭三秀芝盤
堪薦餌一枝藜杖却扶醒柴桑早著歸來賦州
郡分鐫去後銘倘遇仙翁傳秘訣還丹重煉百

年形

壽詹錄王成伯六十

九衢雲日曉鳴珂使節親承寵命多捧詔

闕南當伏暑稱觴梓里迨春和中朝趨走鴈

班肅東府追陪鳳侶過況遇兩宮開壽域侍

臣早已沐恩波

嚴大子春挽詩

聞君高隱陳湖曲裘葛清風接子陵結社尚留
春去酒課兒猶剩夜分燈東疇煙雨人何在北
首江山氣獨乘登壠盡嶮無限意佇看百世自

雲仍

申文學子純以圓詮和尚挽詩見示邀予

同賦

吳地縉流徧海天佛名儒行更無前安貧不慕
華嚴富好事多交翰墨賢壁上偈言留世解篋
中詩草倩誰傳可憐寂寞空門裏唯有殘燈對
影懸

追挽鈕貞甫

夔角過庭便識君詩名醫效總先聞那堪仙去
琴尊冷猶聽人傳子姓文溪上鳬鷺浮暖水隴

頭松栢鎖寒雲草堂依舊多風景鳳里柴桑照
夕曛

虹臯詩贈馬大

問君高隱在江城東郭虹梁映帶明陵植萬松
團蓋影湖開千艘振擲聲花間倚杖青郊合楓
下提壺綠酒澄何必山林深處好紅塵不到此
中清

贈尊川費君榮壽

漢室蒲輪未聘賢也將高義使人傳施恩近及
三千戶介壽初逢六十年楚楚衣冠承雨露優

優杖屨傍雲煙高樓張宴饒供給古鼎尊羹入
口鮮

送烏程令羅君入覲

分符茗雪重賢科撫字如君能幾何
百里有花供眺望四郊無壘聽絃歌
他時白簡承恩近
今歲青錢入選多
聞道飛鳬天上去
大官開讌醉顏酡

湖上集卷之三

湖上集卷之四

大明吳江徐師曾伯魯

五言排律

桐野詩

平蕪有嘉木坐我十畝陰
首夏擎疎蓋新秋響
淨琴金牀風色好玉井露華深
睠此蕭條意會
君岑寂心願言慎培植
寒雪莫相侵

禁城新柳

閣試

春光明禁苑御柳發新條
漸欲垂金縷還看拂
錦標翠蛾初散影青眼半含嬌
風嫋隋堤曲煙

籠漢殿遙藏鶯渾未暗紫雪已全消君莫思攀
折知非是灞橋

張兵部生母袁太孺人表節詩

素幕秋風早虛堂夜月寒心隨驄馬逝

兵部父御史

節竝栢舟完教子名能就承君分獨安冰霜凌
古藥膏沐謝芳蘭玉柱調黃鵠菱花怯紫鸞此
身扶世教餘意勵朝端表觀天書燦絲綸
帝澤寬所須唯壽考長奉膝前歡

送顧建寧之任

送君登路舫幾月到樵川暑入途中雨秋生望

裏天海遙鐔水隔山合建雲連官况絲桐外鄉
心鼓角前虎頭人共識鳳翮世皆憐正是榮名
地相期保暮年

誕日舟中作十六韻呈二三知己兼請垂

和

百歲今剛半纏繇病未蘇幾年曾委珮此日正
懸弧未就三冬業空留七尺軀泛舟非蕩子對
鏡卽凡夫已辨尋山直那思歷傳繻意隨流水
遠心共白雲孤斑鬢長憂世青衫可作圖暮春
歡旣極初夏景還殊雨後寒猶在風前暑尚無

輕黃翻蛺蝶新綠長菰蒲題詠探長句登臨入
奧區煙霞隨地樂牛馬任人呼興到鋪碁局狂
來想俠徒且偕樵谷侶不調酒家胡牢落空憐
汝迂疎莫笑吾非無老馬意何處覓長途

題長橋圖二十韻贈別李教諭

東郊雄澤國佳麗在城闌潁水涵雲塔虹梁跨
玉津天空開俗眼地勝絕輕塵幸有中州彥來
爲末序賓列帷燃絳蠟騎馬踏青春響振堂前
鐸文懷席上珍操觚成琬琰仗劒壯璘珣一見
須傾蓋相親若飲醇盡言探爾志談道任吾真

座揖和風軟門霑化雨均簿書嫌俗吏經史樂
儒臣苜蓿盤餐澹桃花館候新詎愁淹歲月空
羨抱經綸祿薄恩偏重班清職自純丹鉛讎
簡牘容止稱冠紳把酒非尋醉栽葵不患貧官
遊聊適意惜別漫勞神繪事傳名蹟題詩贈遠
人賞心看雪月回首憶鱸蓴歸到梁園日魚書
莫厭頻

壽陳司訓

結宇閩山下前峯入戶青地疑滄海嶠人應少
微星白髮春無盡紅顏藥有靈一官聊適意兩

世並傳經乃祖亦雨露看承誥風雲屬過庭仙

郎善爲政子烈守處州府宜爾樂脩齡

題朱公遺烈卷有序

鄉先達朱公諱紘字子純剛毅人也裋
身尚節事主致身颺歷中外三十餘
年所至輒有聲績晚歲開府閩越海上
之役方已亂於將形而牟利者惡之劾
令罷歸待勘未幾有同姓被逮者公聞
之自謂我也遂仰藥死後果逮公則公
死二年矣卒致倭夷猖獗深入內地四

省驛騷數載乃定使公得畢其志決不
至此則公之功罪昭甚而論者不察至
今猶謂公激之嗚呼冤哉予懷此意久
矣而未有發會其子貞則持卷索題聊
賦十韻以雪之

生前孤孽疾沒後子孫寒牛斗衝刀劒雲霄振
羽翰一麾連刺守十轉副臺端開府宣 皇武
提兵靖海湍功成頻獻捷怨構卻求瘥貝錦才
騰沸鯨波遂渺漫始知終日計不是百年安南
郡旋龜旄西風落豸冠輕生義不辱茹苦節仍

完謗焰何時熄空嗟久蓋棺

送石司訓遷令感恩

釀酒虹亭畔離懷戀別筵談經留舊蹟捧檄問
新遷天末牙樯渡腰間墨綬懸相歡垂四載重
會約三年俗以文翁化名同宓子傳此鄉有明
月莫酌廣州泉

借集周州守園亭因寄十五韻

地負城隈近山因水勢尊湖中流入檻雲外嶺
當軒杏館臨長陌萍池引巨源秀疑摩詰畫勝
似辟疆園偶振南臯策重開北海樽柳仍徂歲

密花到半春繁垂釣將烹鯉分膏爲炙躡籌行
人盡醉坐久鶴高騫覽眺升孤閣賡酬賦五言
主人爲刺史過客狎平原雅集親談笑相思入
夢蒐一州聊再試三徑幸猶存自送登梁道長
令鎖華門詎緣貪薄祿祇欲答深恩聞有投簪
意還從駐短轅

七言排律

送龔行人同年奉使河南

與君三載結金蘭無奈春風送別難雲水幾程
津路曉烽煙千里客心寒時師尚敢辭王事

馳驅苦自識藩封禮數寬瞻洛緬懷前代跡遊
梁雅薄大夫官咨詢不避迂周道匡濟曾聞擊
漢冠莫爲經過徒愛惜論兵須上奉車壇

座上各賦一器得寶劍

昆冶紅煙鑄黑金良工鍛鍊幾年深爐前遙見
雷公到成後方知太一臨霜雪嚴威冬烈烈斗
牛佳氣夜沈沈發劍體製纔三尺出匣光芒射
百尋藏在尚方徒斬馬賈於都市若懷琛千年
猶重朱雲請氣槩能寒佞倖心

移舟北津遲邵御史作此奉呈

去年持斧巡吾邑候代重來住月餘容與共看
臺上雪殷勤爲讀館中書遙知長劒暗相許謾
道新編余所輯文體明辯總不如別後忽驚寒暑換相
逢各謝信音疎多君青眼只依舊顧我白頭渾
變初歲暮江空情未盡還隨楓樹遲迴車

壽沈署丞七十

清秋佳節近重陽老圃黃花數里香南極晶光
臨海甸中吳瑞氣靄門牆采芹類壁承時教扶
杖山林侍夕郎小試昔曾官上苑高風旋復返
家鄉水西舊業君能守濠上閒雲意共長骨法

清臞勤訪道交情稠密好遊方雙瞳善相言多
中五夜修僊訣最良對局每憑銷白晝弄丸殊
勝佩青囊堯蓂三葉舒瑤砌淇竹千竿覆石牀
客履闐門逢七十酒錢行市倍尋常東方謔語
頻傾座藍采歌聲正遶梁肖子昂藏恢世業賢
孫英妙冠詞場懸知後嗣相傳續共祝遐齡享
壽康此去不須探寶籙待看時節換滄桑

許州太守周君六十壽詩

家學無荒仕有聲象賢良不忝名卿才堪作賦
追司馬業擅明經紹伏生京國薦書通籍早銓

曹除目列銜榮武林幾見江潮漲許下曾看竹
馬迎佐郡辛勤共御服握符勞來督民耕入
朝祇述承宣職告老先懷止足情俞旨捧來
君惠重高風聞處世緣輕身隨小艇疑家近路繞
橫塘喜夢清歸到鄉園才二載會逢花甲欲重
更景移陽月臨長至人向青門慶老成華屋啓
筵令刻燭瓊洲邀客解吹笙方枰謾對筠牀列
香茗頻於石鼎烹朋酒獻酬醒復醉雙童歌調
唱還賡夜闌辭去無它祝唯願同諧百歲盟

五言絕句

答廬山人

自別徵君來閒花幾開落相思無了期注目寒江閣

遠山

吳山隔吳水可望不可卽欲卜陰與晴開門看山色

題孫山人畫扇次韻

夕照歸紅樹春雲映碧川故山重入眼猶是鏡中天

橫山

橫山多古墓傳道自梁陳遺跡依然在應知不
朽人

看雲

嶺上多白雲風吹近復遠我亦無心人隨時自
舒卷

新墓望書莊

墩上望吾廬松陵隔煙水晴湖似鏡明片帆飛
十里

書莊望新墓

開戶望西嶺分明見七墩長眠墩下者曾與共

衾溫

中秋聞笛

殘梅落江上羌笛不勝愁
借問今宵月何人獨倚樓

秋夜紀夢

雨滴芭蕉響涼宵八月秋
怪來今夜夢騎馬入皇州

懷友

睡起當軒坐千峯送雨寒
忽思遷客去幾日過銅官

七夕

牛女今宵會年年一度新鵲橋秋思好何必更懷春

讀扶杜有感

扶杜猶多葉叢叢歎此身豈無同父者何不似行人

中夜聞鴈

寒夜聞羣鴈飛鳴字字雙獨憐孤影客起坐對銀缸

弔楊憲副沅蕩阻風

望裏揚雄宅風濤阻去舟
草玄人已逝何處覓
交遊

中秋無月舟中作二首

佳節正秋中歡娛歲歲同
獨憐今夜月孤負水晶宮

有酒愁無月良宵詎易逢
旅懷尤可厭空對數杯醪

閨怨二首

千役一何久憑誰問汝容
忽聞雙燕語羞去對芙蓉

東歸在何時令人凝望眼風塵萬里長思君淚
如瀦

墓上種松

一粒蒼松子栽來幾丈崇祇存封樹制不是望
三公

宿寒山寺下

古寺殘僧少鐘聲寂不聞偏宜愁客睡霜月白
紛紛

過勝墩

十葉承平地烽煙忽內通北門無鎖鑰獨記勝

墩功

昔年倭賊由南都而來故云

被薦書懷二首

謬辱古靈藁休彈貢禹冠
妨賢吾所恥勿謂仕途寬

一疾復一疾馳驅轉覺難
朝中知己少誰爲惜衰殘

過梅堰

傳道梅花堰梅花何處尋
深秋聞弄笛寒色似相侵

秋蚊

秋暮多蚊子飛鳴何可長炎涼有時節勸爾慎
行藏

詠扇

莫以涼颼故深藏篋笥中明年炎暑到依舊弄
薰風

詠瑟

記得湘靈調還傳點爾聲悲歡各有爲總自錦
絃生

渡北麻漾

吾族在南麻在

南麻復北麻相望水雲斜欲問吾宗譜晴暉十

里沙

七言絕句

詠昭君八首有序

古今詞人詠昭君者無慮百家大抵皆
據其憤鬱之思而嗣其怨恨之響未聞
慰以臣妾之道者遂使捐軀報主之義
泯焉亡存詞雖沈玄不足取也予故爲
之更賦云

一自君王選入宮癡心日夜望春風單車忽遣
嫁胡虜不怨君王怨畫工

月滿長門瑣闥開無緣不遇漢皇來今朝承命
趨沙漠依舊丹心戀紫臺

不向椒蘭拜婕妤也來氈毳作月氏妾身富貴
生前命但恨華夷負宿期

漢家何道伏穹廬上策全憑定國書但願單于
懷皦日不妨異域獨捐予

生子當爲漢外孫舅家風格自應存看渠不逞
豺狼性始信平胡在結婚

王度寬容天地如不教徒旅滅穹廬只愁和議
原無益空使琵琶怨乘輿

盡道琵琶怨漢皇豈知奴命合投荒若還不遇
毛延壽畢竟無人嫁異鄉

莫向轅門解陳行欲憑來使報君王邊關若漏
真消息寧使餘生失鳳凰

贈賣茶者

遠攜筐篋味殊真片片中山紫笋新市客只愁
容不得何須湯釜沃茶神

莊居夜半聞寒鵲聲枕上口占二絕

不爲明朝喜事連那將羣舌噉霜天寒棲想爾
同蹤跡故遣愁聲到枕邊

棲遍寒枝不肯留
夜呼徒侶共相求
西風樹樹應吹盡
何似隨緣只便休

送何教授表兄還藩府

王家歌管在高樓
此去追陪樂未休
來歲秋風吹汴水
不知萼菜憶君否

朴齋詩贈徐太

茅屋繩樞槿樹垣
何須他處覓桃源
主人猶厭繁華景
卻怕春風到小園

逸齋詩贈徐二

年來耕讀任兒郎
謾酌村醪送夕陽
怪底簷前

雙燕子飛來飛去爲誰忙

坐客偶談近時貪人多爲丹客所敗會有
持畫仙求題者賦此應之

緱山嶺上少人行只爲還丹不可成莫道當年
王子晉飄飄容易學吹笙

送邢貳尹赴昌平判官

輕舟載月泛江流千里丹楓值素秋別後思君
在何處八陵山色拱神州

題杏花賜燕圖

紫燕翩翩出禁林曲江亭畔杏花深遊人正憶

唐朝事滿路笙歌接鳳音

沈二一鳳寫竹見贈并貳以詩次韻酬荅
數竿修竹吾廬淨三徑依然鎖綠雲莫道山林
忘帝室也將高節助明君

摘槐花

手栽槐樹蔭清涼歲歲收花只染黃今日孱軀
添一疾呼童旋摘試醫方

登高

白酒黃花相勸酬登高良不負清秋從今好續
藍田會歲歲茱萸更插滿頭

梳頭

謾將蹤跡伴樵漁兩鬢蒼蒼日就疎見說塵中人易老不知塵外竟何如

客有欲出塞者賦此沮之

周道委蛇匹馬班春風不度玉門關貂裘零落詩瓢冷到此方知路險艱

喜亡友子登科

王寵光之子有功也

嚴親本是酒中仙教子殷勤欲象賢

先世有爲都御史者

特稱名臣今日試聽南國報芳蒐才喜慰重泉

閱科場時義有感

經籍無如帖葉賢青雲有徑士多穿腹中記得
億萬字翻笑當年包孝先

弔周倉官

幕下辛勤歷數年謫官南下入重泉憐君不作
胥徒態長夜悠悠抱志眠

過殊勝寺

鷺脰湖邊古寺荒數年烽燹到空堂獨餘秋水
淼無際相共長天一色蒼

詠舟幔

聯布成帷綴彩旒每因紅日挂孤舟東遷西就

無休息欲息還須夕照收

過八斤

昨宵樵鼓欲三更獨飲厭厭夢不成今日如何
復沽酒隔船聞賣蟹螯聲

詠申生

共惜申生不自容易名非孝只爲恭太常詎識
時君意女色迷人勝醉醲

詠屈原

懷沙赴水自湛身同姓原非異姓臣若道湘纍
應不死比干焉得列三仁

詠荆軻

易水風蕭水又寒區區七首悞燕丹可憐快意
非長策何似縱人去復還

詠戾太子

戾園何意便興兵讒口薰天死卽明莫道從權
方是孝恭名輸與晉申生

詠陳子昂

建安之後五言微振響如君世所稀獨惜明堂
空議禮武家王制是邪非

代人壽黃道士六十

採得神芝路不迷下山名岳又招攜尋師指授
長生訣共聽淮南午夜鷄

雜言詩

雪夜同龐兵部同年集楊鴻臚宅

皇都春寒雪正飄一夜覆地三尺饒平明起看風
景異吾廬直接天漢遙忽聞扣門聲云是來相
招手持魚牋不盈尺封題凍迹猶未消上言草
玄偶餘暇烹鷄漉酒聊坐邀我欲赴此集僕夫
苦寒宵此中孤疑殊未決雪花浙瀝添寂寥須
臾有客約同去披氊跨馬還竝轡行行只計百

步多返照微微射雙騎主人迎客意極歡把袂
登堂各爲位重帷閉暖映虛明銀燭煌煌高插
檠紅鑪蕪炭列兩楹融融和氣藹新晴清歌纔
發繞梁聲滿堂喧笑酒頻傾誰爲畢吏部誰爲
阮步兵誰爲嵇中散誰爲謝宣城古今風流不
相及豈知千載同高情迂談縱飲興轉劇頓忘
蹤跡如浮萍我歌此歌諗同好青春作伴時相
報此去寒威次第收百花開處應須到九十春
光曾幾何勿令佳景付蹉跎主人有酒客有歌
相逢無奈意氣多夜分旣醉客辭去出門殘月

上鑾坡但遣主人能好客不妨百遍長相過

題蘭亭圖贈楊鴻臚

楊卿手持蘭亭圖勸我試作蘭亭歌圖中景物
此處無見者盡道來姑蘇闔閭城門門有六封
門獨枕松江澳洞庭映帶芙蓉青七十二峯森
在目勝地由來待美人伐石翦荆勤卜築街衢
窈窕謝煩躋中結茅茨數椽屋東崖合沓西峯
傾亭臯隱軫山外明長松環抱曉霧輕脩竹戛
擊涼颼生亭中不植錦繡花但植幽蘭挹晚榮
縹緲葳蕤綴丹穎綠葉扶疎抽紫莖同雲忽捲

蒼山岫風散瑤花清馥透有時朗月澄碧天霜
露微微疎影瘦願言與爾結同心何須紉作騷
人纓自到長安舊業疎遭逢聖主紆簪裾鳴
鞭走馬意氣壯爲國司賓侍玉除輜塵撲面
不敢拂肯將蹤跡同樵漁退食委蛇好遊宴上
林花柳仍堪羨綺縠叢中樂未央繁華頓使初
心變遊罷歸來始憶家昔日清芬翻可戀亭中
興趣澹且長名卉天然吐國香京華留滯歸未
得何不揮毫染練縣高堂文翁翰墨名海外家
學相傳德承最繹思搖管驅江山落筆點點成

珠貝鬚鬢楚晚生雲煙會稽禊事懷先賢桑梓
迢遙敬共止階前玉樹還森然朝披夕玩總不
厭滿庭空翠真芊緜時不延蘭欲艾日月竊恐
浮雲蓋願卿珍重保餘芬勿爲秋風之所敗

題牡丹圖

名花出幽谷移植自西河上稟玄瑞精下洩流
霞波丹延青越何足數洛陽第一名不磨此花
變易幾千種畫者尚少誰云多年華荏苒春氣
極綠苞如珠清露滴韶光乍曉物態新紅英朗
耀良堪覲美膚膩體真絕奇一似佳人長袒裼

朝酣晝醉夕照醺晴籠日日成錦紋不緣衆色
間深淺那得餘輝應洛文玉欄風滿繡戶啓千
顆萬朶殊紛紛只愁風雨忽然至香銷粧洗如
浮雲人世豪奢聊適意何必牛酥并遺加殷勤
古來圖賦能有幾子華太白稱奇偉金花牋紙
且勿誇自我言之殊瑣尾孰知傾國被惡名當
使時君置戒屏玻璃杯酌葡萄酒休教倚調歌
清平繁華自是戕人斧會須朝兢暮業持盈成
嗟予抱迂癖雅薄富貴情任花自開落不與春

風爭

湖上集卷之四

湖上集卷之五

大明吳江徐師曾伯魯

奏疏

酌處川兵殺掠事宜疏

兵科給事中臣徐師曾謹題爲敷陳末議酌
處川兵殺掠事宜以昭憲典以弭變亂事臣
前接得江西巡撫都御史蔡克廉巡按御史高
鏞各一本內稱四川調發成都等衛及酉陽等
處漢土軍兵經過湖口縣虜掠南安府應朝
知府護送兵快船隻殺死快手劉萬等四名混

砍九江衛鎮撫曲禮至死及殺巡按衙門已故
歷事監生男于弘業乞要究治會題前來事下
兵部未見議覆臣竊疑之夫使川兵不知江西
有此會疏猶之可也假令知之或懼不測之誅
必懷疑慮或覘姑息之意遂無忌心有一於茲
皆足致亂臣聞明罰所以勅法變通所以趣時
川兵應調而來上奉 朝廷之命下受監統之
轄乃敢肆行虜掠戕殺官民此而不誅 國典
安在且使客兵效尤將來地方受害必有不可
勝言者明罰勅法此其時矣但兵至軍門方欲

用其力須先結其心若盡按法而誅之則輾轉
根究人人自危此又變通之時也竊意諸軍始
因虜掠兩相格鬪勢不能遏遂至殺人殺人不
已遂及職官向微虜掠之謀則此六命寧有及
乎且方是時兵刃交加孰爲手傷彼亦莫辯故
今首惡不在隨從下手之人而在倡謀虜掠之
人臣謹按春秋治衛孟縶之獄手刃縶者齊豹
也釋豹不誅而歸罪於宗魯以爲宗魯齊豹之
盜孟縶之賊其身已死猶不得贖所以清亂本
也通於春秋然後能權天下之事矣臣又伏覩

大明律內一款凡謀殺人造意者斬從而加功者絞其造意者身雖不行仍爲首論夫功意斬絞情罪有差變通之權實在於此故造謀虜掠當與造意殺人者同科乘勢混殺則與加功者異矣稽之聖經旣如彼叅之今制又如此罪犯所坐抑又何疑該部不以時覆奏行罰何也臣竊料該部之意不過度諸軍不知前疏苟且帖然而已夫職官遇害縱無特疏亦不能掩於報缺襲補之間安有有之而不知者彼度不免必懷猜懼又惡在其帖然也頃聞當事之臣先令

何卿姑以溫言慰衆欲俟功成徐行問罪之典
此又不可之大者果爾是使何卿爽信於下頓
失衆心異時號令必不行矣且使諸軍怨望將
謂我輩有功反被刑戮此其爲變當亦不小伏
乞 勅下該部將臣所言再加詳議如有可採
亟行總督撫按諸臣并原任副總兵何卿密切
體訪首謀虜掠之人不許預泄事幾致生他變
果得真正罪犯止摘一二問擬如律明正典刑
其餘隨從下手之人不必窮治一面出給告示
廣宣 朝廷德意諭令安心殺賊以圖報效其

監軍僉事焦希程統兵遊擊曹克新亦宜重加
罰治以爲師行失律之戒如此則冤死者瞑反
仄者安統領者嚴暴掠者戢而數萬客兵咸知
懷畏矣臣誠愚昧待罪該科偶有見聞輒妄塵
瀆若謂仰裨 廟謨則非臣愚所敢冀於萬一
也臣無任隕越戰兢之至緣係敷陳末議酌處
川兵殺掠事宜以昭 憲典以弭變亂事理未
敢擅便謹題請 旨

請爲故蘇松兵備叅政任公立祠贈官疏
吏科給事中臣徐師曾謹 題爲乞 恩查例

優卹典以勵臣工事臣竊惟鞠躬盡瘁固臣子職守之常而崇德報功尤朝廷激勸之典伏見故蘇松兵備叅政任環性植忠貞志存匡濟自嘉靖三十一年倭夷內犯時環任蘇州府同知卽事戎行歷陞前職至三十五年十月回籍在任首尾五年中間官秩雖更而督兵如故晝夜焦勞終始無二當是時客兵獷悍而難馴鄉兵脆弱而難用環於其間外和悍卒內統疲兵調停鼓舞之方無所不至常思以身殉國誓不與賊俱生故其所御衣裳皆書姓名其上

以防收瘞每遇對敵輒挺身先登不復顧忌用
是人人感奮多致克捷計其前後俘斬之數不
下二千餘名顆而勝墩雉瀆福山前馬諸處厥
功尤偉至於開門納人活蘇民百萬之命沿途
掩骼騰郡士三殤之文其他惠政不可枚舉蓋
自用兵以來致身任事之臣唯環一人而已是
以督撫大臣屢更屢蹶甚者至于天刑而環
勞績獨著非夫一念忠誠足以感人不至是也
使一時文武大小臣工皆若環之立心則倭寇
之平不待今日矣回籍未幾尋至物故由領

兵之時濕熱交侵憂勞竝作病根沈痼醫療不
痊計至江南士民無不流涕仰冀褒卹而不可
得臣竊憫之臣嘗考之祭法有曰以勞定國則
祀之曰能捍大患則祀之曰以死勤事則祀之
凡此三者環實兼而有之矣臣又查得先年巡
撫蘇松尚書夏原吉侍郎周忱有功地方竝得
贈官立祠故今蘇州有兩尚書廟竊意當時卷
籍或因年遠無存而 會典開載昭然具在環
之事體實與相同况其時勢之難比於二臣抑
又有甚焉者豈可使之泯滅無傳於後哉伏覩

邇年陣亡文武諸臣如叅政錢泮等俱因憲臣
奏請蒙 恩褒錄而環事功更顯顧無一人爲
之陳乞者此臣之所以拳拳也頃臣在籍嘗見
闔郡耆老生儒沈崑周原信陳清龔良相沈棡
時化成等語及此事言甚懇切臣謂人情如此
所當順從如蒙 陛下俯察臣言俛從民志乞
勅吏禮二部查照夏原吉周忱事例准與立祠量
贈一官庶已逝者銜結圖報而將來者感發思
奮矣緣係乞 恩查例優 卹典以勵臣工事
理未敢擅便謹題請 旨

乞養疾疏

吏科給事中臣徐師曾謹 奏爲中途患病不

能赴 闕復 命懇乞 天恩容令回籍調理

事臣原籍直隸蘇州府吳江縣人由嘉靖三十

二年進士改庶吉士三十四年十月內授兵科

給事中三十五年六月內回籍三十八年八月

內復除今職三十九年十月內該禮部題奉

欽依以臣充副使同正使前往河南 冊封 周

府汾西王等主儀封王妃等妃俱各行禮畢臣

隨依期起程前來復 命緣臣氣稟素怯自弱

冠時赴舉應天飲食失時致成脾胃之疾醫治
不效纏綿至今平居則日飯一甌疾作則勺水
不入此皆同僚同鄉官所共見者奉使以來陸
路顛頓饑飽不常前疾頻發胃脘脹痛牽連脅
脅嘔吐喘噓呻吟嗷號苦楚萬狀旬日稍可間
一二日又發沿途倩醫調治迄無一效近見邸
報今年閏五月內欽蒙 聖恩陞臣爲兵科右
給事中臣不勝感激望 闕謝 恩力疾前進
行至徐州地方欲就水路以便湯藥不意病勢
日增形體尪羸精神銷耗匍匐不前醫人診視

皆云病久脾虛以致肝木來乘胃火上炎非旬
月可愈用是萬不得已哀鳴於 君父之前查
得嘉靖三十八年四月內該行人司行人孫丕
揚差往 周府公幹中途患病奏乞回籍調理
續蒙該部題覆 准放臣與孫丕揚事體相同
而臣病尤甚伏望 皇上憫臣微軀 勅下吏
部查照近年行人孫丕揚事例容臣暫回原籍
調理儻獲生全則臣尚存之年皆圖報之日也
臣下情無任隕越懇祈之至爲此具本專差義
男徐鵬抱齎謹具奏 聞伏候 勅旨

再乞養疾疏

吏科給事中臣徐師曾謹 奏爲給文赴部中
途患病懇乞 天恩容令回籍調理事臣係直
隸蘇州府吳江縣人由進士改庶吉士授兵科
給事中復除前職嘉靖三十九年該禮部題奉
欽依差臣前往 周府 冊封禮畢復 命間四
十年節蒙 聖恩陞臣爲兵科右給事中刑科
左給事中比因中途感患胃脘脅脹痛等證
奏蒙吏部題奉 欽依行臣回籍調理至四十三
年八月內前病稍可本年十一月內給文赴部

行至揚州府江都縣地方前病復作請醫調治
迄今兩月有餘用藥罔效醫人診視臣脉皆謂
病根已深展轉作輟決非旬月可愈臣伏自惟
起文赴部已有期限中途疾作力不能前情苦
勢迫不得已哀鳴於 君父之前查得嘉靖四
十年四月內工科給事中衛東吳亦以起文赴
部中途患病荷蒙 准放回籍調理臣今事體
實與相同伏乞 聖慈 勅下吏部查照前例
容臣暫回原籍調理臣病儻得痊愈尚當竭犬
馬之力於將來以圖報 皇上再造之恩於萬

一也臣無任隕越懇祈之至爲此具本專差義男徐玘抱齋謹具奏 聞伏候 勅旨

乞致仕疏

原任吏科給事中今養病臣徐師曾謹 奏爲病勢沈痼不能赴部懇乞 天恩容令致仕事臣係直隸蘇州府吳江縣人由嘉靖三十二年進士改翰林院庶吉士三十四年十月內授兵科給事中三十五年六月內丁嫡母憂三十八年八月內起復到部復除前職三十九年十月內該禮部題奉 欽依差臣前往 周府 冊

封事竣復 命間四十年閏五月內陞臣爲兵
科右給事中比時行至徐州地方感患胃脘胃
脅脹痛等證醫治不痊七月內具本 奏乞回
籍調理事下吏部行查間本年十月內陞臣爲
刑科左給事中十二月內蒙吏部查明題 准
放回四十三年十一月內給文赴部行至揚州
府江都縣地方前病復發不能前進四十四年
正月內又行具 奏本年三月內蒙吏部查覆
題 准回籍調理今又垂三年矣竊念臣一芥
草茅荷蒙 先帝拔擢儲之 中祕置之侍從

聖恩深渥百倍恒品茲者伏遇 皇上登極治教

一新雖草木無知亦皆欣欣向榮而臣獨抱病纏綿弗克自效此臣之所爲拊枕而太息也見今病勢沈痼藥餌徒施六年之間迄無一驗形體尪羸精神銷耗毛髮焦枯飲食減少醫者之技已窮生人之理將絕自分此生不能強起乃敢哀籲 君父之前伏望 皇上憫臣螻蟻微軀 勅下吏部查照見行事例容臣致仕儻獲苟延殘喘尚當明農課子以報我 皇上再造之恩於萬一也臣不勝戰慄隕越懇祈之至爲

此具本專差家屬徐經抱齋謹具奏 聞伏候
勅旨

再乞致仕疏

原任吏科給事中今養病臣徐師曾謹 奏爲
廢疾不痊難勉效用懇乞 夫恩容令休致事
臣係直隸蘇州府吳江縣人由嘉靖三十二年
進士改庶吉士授兵科給事中復除前職嘉靖
三十九年十月內差往 周府 冊封行禮畢
中途感患胃脘脅脹痛等證 奏乞養病間
歷陞兵科右給事中刑科左給事中隨蒙吏部

題覆

准放回籍調理嘉靖四十三年十一月

給文赴部中途疾作四十四年正月具本再乞
養病續蒙吏部題奉 欽依放回隆慶二年三

月具本爲病勢沈痼不能赴部懇乞 天恩容

令致仕事本年四月蒙吏部覆題爲照本官志

勵清脩性甘恬退但當年力尚強之時雖稱患

病尚堪調理難以遽准休致仍令在籍調理痊

可之日給文赴部聽用等因本月二十四日奉

聖旨是欽此欽遵臣仰戴 天地覆載之恩 朝

廷惜才之意感極流涕勉思效用不意四散求

醫多方治疾又及三年百無一驗毛髮蒼黃形
神衰憊福過災生理之常也臣亦何尤臣自數
年以來伏枕長歎自度此生決不能竭犬馬馳
驅之力以答 聖恩是以瀝血陳情再伸前

請臣查得嘉靖十年三月內吏部題 往事例今

後內外官員有疾願告致仕者聽今臣事體與
例相合况臣廢疾尤與有疾不同伏乞 勅下

吏部查照前例容臣休致儻溘先朝露則當嚙
結於幽途若未填溝壑則思補報於今日此臣
萬分激切之忱而百拜稽首致望於 君上者

也臣無任戰慄隕越之至爲此具本專令義男
徐經抱齋謹具奏 聞伏候 勅旨

重乞致仕疏

原任吏科給事中歷陞刑科左給事中致仕今
起用臣徐師曾謹 奏爲病體衰殘不能赴任
懇乞 天恩容令照舊致仕事臣原籍直隸蘇
州府吳江縣人由嘉靖三十二年進士改庶吉
士授兵科給事中復除吏科給事中陞兵科右
給事刑科左給事中一向在籍養病隆慶五年
四月內 奏乞致仕節蒙吏部題奉 欽依給

劄致仕訖今於萬曆二年七月初九日接得吏部劄付起用臣爲禮科左給事中竊念臣先受兩朝高厚之恩今荷皇上再造之德雖甚愚闇豈不勉思報效以盡臣子之心哉顧臣弱冠飲食失時致患胃脘脹痛等證積有歲年遂成痼疾血氣俱虧齒髮倏變久坐則頭眩久立則股栗僅存蠕動難強馳驅況臣疾作無時不可預料假令不自忖度冒昧而出或如失朝則門籍不及開註或如侍班則僵仆不能忍耐臣雖萬死罪何足贖此臣所以瀝血陳情乞骸於

君父之前也伏望 皇上察臣愚悃憫臣殘軀
勅下吏部容臣照舊致仕俾正丘首則他年長逝
將銜 恩九地永永無極矣臣下情無任戰慄
待罪懇款哀祈之至爲此具本專差義男徐璧
抱齋謹具奏 聞伏候 勅旨

湖上集卷之六

大明吳江徐師曾伯魯

書

上座主茶陵張尚書書

沈上舍惟良歸傳示問及厚意拳拳屬望懇切不敢當不敢當某自結髮讀書便知海內有張先生矣瞻仰山斗跂竚莫及不意丁未校藝春闈謬見收于門下當時入彀之士或儲館中或選郎署或補郡邑皆得依日月之光展經綸之蘊而某獨臥病不克對制已而南還承雙親

之歡畢生母之葬乃知此行亦不虛矣某聞之
積厚者流光養盛者用利故欲乘此閒居緡閣
舊典諸前代之故事考國朝之令甲庶幾他
日出而就官或可應酬政務不辱門牆爾吾蘇
畿輔旁郡去留都不遠時有便風幸惠德音

與南太僕主簿許元復書

仙舟北上贐餞竝缺負譴何如適聞拜命南
還殊切喜慰問寺清曹幕僚閒職以公居之孰
謂非宜況滁陽佳麗兼多古蹟雖宋人擒將之
所杳不可尋而皇祖發迹之鄉密邇易考且

醉翁豐樂遺址猶存足共吟眺公暇從二三大
僚酌酒賦詩亦能舒豁曾襟休暢眸目勿謂此
中非大賢之路也近世才名之士莫如履吉然
未仕而逝今公行年頗高又幸小試加以尋山
問水之雅興樂天知命之高情當無不豫者諒
弗俟僕之喋喋也昔年寒舍四扁仰塵手筆迄
今懷感頃築別業于南湖之上以娛暮景不揣
煩瀆更有所請乞題南漱書莊四大字懸諸衡
門以爲光寵伏惟暫解尊冗增我餘輝幸甚幸
甚薄幣將賀并往望叱納

與胡秀才書

曩承教督深感雅情恩恩送別不盡所言故敢
寓書以對足下勸僕以再出望僕以勉 恩此
人情之常世俗所謂孝也僕爲人子獨無是心
哉顧自以爲孝者立身行道揚名後世以顯父
母恐不在一命之榮也僕結髮讀書壯年應舉
亦欲赴功名之會成致澤之勳而事乃有大謬
不然者宿疾侵尋仕不得志上之不能奏片言
于 聖主下之不能施纖惠於小民徒竊位素
食妨賢誤 國每一念至流汗浹背故退而耕

於野藥餌之餘兼修素業託遺經以自見雖不
得行道於當年或庶幾垂名於後代幸不辱先
耳非敢頓忘父母自便身圖也且先人嘗以藝
進爲邑醫師一不得意便引疾乞休至獲罪于
監司而弗悔夫豈以冠冕名利動其衷邪僕雖
不肖事頗類此向使先人享有上壽迄今猶存
須徼 恩命以爲寵榮衣錦乘軒迴出齊民之
上僕雖碌碌俛首誠所甘心然猶慮先人不樂
乎此也今不幸背棄幽明路隔縱得 恩命焉
知能光耀于夜臺之闕否邪徒令僕喪其平生

貽父母之羞辱爾近代顧尚書華玉移王子衡
田景瞻書皆勸勿出夫顧公豈不愛人者哉愛
之以德而已前輩風流槩可想見今人曾晤第
問何時遷擢何時起用至於志之得不得道之
行不行弗計也足下智慧高朗視顧公不少讓
迺亦以此望僕猥同衆人之見乎且勸僕者謂
當勉強一出俟考滿後便歸未爲失計果爾是
爲親之念重爲 君之念輕僕不忍也 君親
一體忠孝一道豈敢低昂於其間乎敢布腹心
伏希亮察前者周易補義蒙付書賈傳諸江南

今鄙懷不愜重加刪刻更名演義因風并往幸
賜教復禮註垂成次第請正不宣

與孫諭德文和書

先母之葬十有三年矣當時自撫世系事行卒
葬月日泣血爲誌而不敢勒銘妄欲效歐陽公
之緩未便辱韓昌黎之筆意蓋有待也何圖命
運乖蹇大戾初志宿疾纏綿歲久不愈自度不
能強起以徼 恩命於將來始買石倩工镌寘
玄室以圖不朽顧閨壺潛德非假名公數言曷
足增重伏惟吾兄世掌絲綸翺翔史局謹愿亢

直不肯隨俗毀譽故凡片紙一辭皆可信今傳
後沉某見錄於先公廁名於牘未追隨 中祕
垂及三年海內相知孰有如吾兄者雖雲泥迥
絕而交誼孔敦緬審高懷諒不我拒故敢北嚮
再拜走价持幣奉誌以請所冀借時刻之間吐
珠璣之韞俯賜銘詞取徵來世慰先靈於地下
追重譴於寰中志願畢矣宿草自蕃引領并埃
不盡不盡

答趙淮獻書

往歲惠教具區諸篇詞意瀟灑讀之使人有蟬

蛻汗濁之氣留之縣志當與宋之間詩竝傳豈
但可附集末已也無便未復罪過罪過頃施子
歸致手教佳章仍委筆削顧僕非知詩者何以
當此然少嘗有志詞藝之林壯復放浪湖山之
外抱古人之集而讀之或亦時見一斑爾竊妄
謂往年諸篇徒宗翰林之逸而乏工部之精今
所寄始能兼之如幻身如夢夢還無白粲無瑕
玉黃含百煉金日落千家郭風來萬里船江月
弄虛影林風振寒聲幾於絕唱豈所謂晚節漸
於詩律細者與喜足下之進又不能不自歎其

退也深秋或能泛舟潯川相對細談第未知良緣何如耳

再與趙淮獻書

近承枉顧南湖之上并示佳集且委評選豈謂僕粗有知識能永其傳邪悚息悚息夫詩不易作亦不易選故受命以來繙閱數過而後措手乃就諸體若干篇中選取止此非敢謂足下之詩不佳蓋求精耳且詩之傳在精不在多杜審言工部之祖也集止數幅歷千餘年不泯非以其精乎唐人選唐詩若國秀極玄河嶽英靈諸

編均非巨帙所謂代不數人人不數篇者誠至
論也足下所著富至千篇而諸體各有短長故
入選者或什五六或什二三所取不多無足怪
也僕誠不能窺詩人門戶然竊妄意以爲詩有
格調有神采有字法句法格調見於神采之外
神采藏於格調之中若字法句法所以經緯二
者而動人膾炙非謂纖穠藻麗綴緝滿紙而以
徒多爲勝也故有一句不佳卽弃一聯一聯不
佳卽弃一章者此選詩之法也今欲因一句一
聯而存一章將無魚目混珠之謂乎卽如草玄

翻墨汁擊劍落霜花隱几時看高士傳閑門嘗
謝故人車剪取白雲爲帔服斲來黃獨當餼糧
頽壁雨深蝸自篆小檐泥落燕空巢心同逝水
歸滄海興逐孤雲渺太虛寄情欲折江邊柳問
訊遙憐隴上梅坐臨流水心如洗臥對孤雲意
更閒又如唯有中天月應憐白髮愁張翰不歸
秋寂寞西風吹老紫萼絲何時縮地一相訪掃
榻與君秋臥雲不知濁世紅塵裏消受清風有
幾人忽有尊鱸動高興夢隨煙雨落松江空山
雪後月初霽折得梅花寄遠人竝是佳句第恨

全章不相稱耳必欲因此而盡存之恐爲後世
所嗤笑也若加改竄使前後相稱則入選何疑
嘗見勝國時月泉吟社集中有摘句圖蓋取人
所長不忍輕棄之意足下倣而存之不必全載
可也足下如以僕言爲然則當承命作序刻此
二百三十餘首至足至足矣毋事姑息令後人
窺其淺深也伏惟裁示以爲進止幸幸

與巡撫張公書

伏承明公以賤姓名應 詔甚盛惠也明公言
之而 聖君賢相聽之甚盛遇也某非草木豈

不感激思奮而甘自同於朽腐哉顧以壯年遭
疾侵尋至今形神漸耗齒髮就衰雖未六十已
如七十人矣卽欲仰酬知己勉強馳驅而精力
弗勝動致顛仆假令會朝趨班而宿疾忽作
頓蹶于殿陛之下得罪禮官其將何以解之
病勢如此尚安望其謀畫獻納以效言職之萬
一乎伏望台慈俯察微衷俾遂退休之志倘仗
洪庥少延殘喘則將來待盡之年皆明公之賜
也感當何如外具狀揭二本統冀台照幸甚臨
書無任懇款悚仄之至不宣

答王成伯書

去冬勉葬亡妻伏承令郎奠送謝謝葬畢卽了
幼男婚娶遂傳家於二子營葬之時便穿一穴
以待盡已爲世外人矣不意監司謬舉當道誤
聽忽有禮科之補慙愧殊甚頃辱手書教督惓
惓非不懷感顧僕之不可出者有八 先朝多
事僕碌碌無所建明故竊自附於不能者止之
義今上有 聖君下有良輔羣英濟濟布列中
外政靡闕失寰海清平僕雖強出奚補於時徒
遺北山之誚而已其不可一也臣子事君在心

與力心固無時而變力則有時而衰馳驅奔走
非精神矯健者不能今僕齒牙搖落鬚髮蒼黃
皤然一老人矣縱有戀闕之心奈力不逮何
其不可二也凡選耳目之官例年三十以上五
十以下故敝衙門諸公有強壯而無老弱僕獨
以一老人廁于其間令旁人觀之駭而見問豈
不輕朝廷而辱同列哉其不可三也賤恙作
輟無常難可逆料晚發則致失朝而門籍無
由開註早發則致失儀而罪譴無以爲辭其不
可四也僕性迂僻不善奔競尤惡終南捷徑之

事自病廢以來甘分永棄故撫按謬稱不過曰
泉石投閒絕意簪纓而已今也復出無乃所行
非所稱乎其不可五也山妻旣亡獨處一室兩
兒析居各有學業從師理家勢難隨侍僕以孤
身遠寓四千里外無一親人在旁脫有緩急何
所依賴其不可六也應門之僮至蠢至拙卽如
名刺細事易耳已不能辦一籤一字亦須手製
林居事簡間一爲之力猶可及若仕途凶冗應
接繁多不親則草率取罪親之則日亦不足況
有難於此者乎其不可七也寒舍產薄其傳家

也各授瘠田二頃而自留四頃歲入僅足四百石除輸賦及家人衣食親友慶弔外豈復能供宦邸芻米僕賃交際之費乎其不可入也凡此皆肝膈至情無所逃於明鑒者乞以此指徧告同年同鄉及舊識諸公卿間使當道聞之或能垂亮以遂首丘之志感德多矣伏惟台照幸甚

與光州喻上舍書

某初以文辭被令先公知愛最深繼游京師又承教督後某因差請告遂乞歸田自是音問希闊及令先公轉官南都方圖奉晤不意考績甫

還遽爾仙逝比傳訃音則丹旌已返北矣後有
貴鄉塗先生司訓敝邑乃欲寓詞附奠業已辦
治而塗公不久卒于官頓令遲悞至今未嘗一
日不繾綣於懷也茲因敝友邵芸庭補令羅山
同出令先公門下乘便展敬奈今墓木已拱而
某始獲致生芻之奠罪歉何如然山川阻修有
志未能非敢忘情於恩府也亮之亮之

與文掌教休承書

往歲丁巳僑居郡城晉謁先公于堂下時公扶
侍因覲粹容蓋望而知其爲古君子也未幾僕

返故里弗獲繼見唯一登拜先公之几筵自後
公在仕途僕久謁告不相聞者若干年每於友
朋間見佳製輒把玩不釋手公詩文書畫竝入
高品足紹先公不朽之業父子兄弟擅名一時
甚盛甚盛僕頃築生壙于橫山自記草堂有感
而作竊念不腆之辭非藉公法書無以傳遠不
揣僭瀆聞公秋暑謝客敬修尺牘託董子持上
記室儻筆研少間乞賜揮灑則茅屋增寵多矣
書畢望詳列貴銜近見士人求大筆而假他名
者真俗見也僕非計秩崇卑者正欲借重耳亮

之亮之薄儀并往伏惟鑒存不備

湖上集卷之六